

Date – 22/09/2025

Time - 07:30 -07:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Vawiin atangin ram puma GST chhiah tih hniam a nih dawn avangin Mizorama lirthei zuartute an lun hle.**
- 2. Aizawl leh Silchar inkar kawngpui a chhiat leh hle tawh avangin lirthei engemawzat an tangkhang mek.**
- 3. Prime Minister Narendra Modia chuan GST thar chuan ram hmasawna chanchin a rawn thlak dawn tih a sawi**
- 4. Union Health and Family Welfare Ministry chuan tun thla ni 20 thleng khan ramchhungah health camp nuai 2 sing 8 leh sang 3 chuang Swasth Nari Sashakt Parival Abhiyaan hnuaiah buatsaih a ni tawh.**

<><><>

GST

Vawiin atanga ram puma thil hrang hranga goods & services tax (GST) tih hniam a nih dawn avangin Mizorama lirthei zuartute an lun hle.

Mizorama Hyundai car zuartu lian CK Hyundai neitu Pu Joseph Lalchhanhima chuan Hyundai car hi hauh lawk an tam hrim hrim bakah tun hnai-ah hian GST rate a tlawm dawn tih hria-in hauh lawk an tam zual niin a sawi a. Tunah hian Hyundai car hi 130 atanga 140 vel an kawh mek tih a sawi bawh. An car tha leh man to, cheng nuai 30 man bawh vel, Hyundai Tucson chu cheng nuai 2 chuanga a man a tlakhniam dawn avangin hauh lawktu an pung hle niin Pu Joseph Lalchhanhima chuan Akashvani Aizawl a hrilh a. Hyundai Verna pawh hauh lawk an tam thu a sawi. Anmahni lamin sawi darh chiam lo mah se September ni 22 atanga thil engemawzat a GST rate hniam tur hi hria an tam avangin hauh lawktu an pung a ni a ti. Ram chhunga hralh kal ber zinga lang pha Hyundai Exter pawh Rs. 65,000 leh Rs 70,000 inkarin a tlawm dawn tih a sawi bawh a ni.

Hetih lai hian GST tlak hniam vangin Toyota car chi hrangte chu a man a rawn tla hniam vek a, heng a man tlak hniamna zat tur hi tih fel tawh a nih avangin a tlawmna zat ang hian tunah ZoteToyota, Chanmari West, Sairang Road ah an hauh lawk mek a. Zote Toyota hotute'n an sawi danin Toyota Car Land Cruiser phei chu a man hmasa aini Nuai 16 chuanga a tla hniam a, heng car man te hi class tinah a danglam thung a. Car hrang hrangah hi a tlawmna zat erawh a inang lo a, a hma lama a manah a inngat niin an sawi.

Car man a GST tihhniam hi India-ah hian car pianzia leh an chak zawng angin teh a ni a, Car (petrol hman chi cc 1,200 leh diesel cc 1500 metre 4 chin hnua lam chu GST hi za zela 18 lak a ni tawh dawn a, a hma chuan za zela 28 chuanga lak thin a ni.

ECI – RUPP

Election Commission of India (ECI)-in ram pum huap leh state hrang hranga Registered Unrecognised Political Parties (RUPP) a thenfai mek zingah Mizoram ami 2 an tel ve.

RUPP te hi ECI-in political party a a pawmpui la ni lo, mahse, inziaklut site an ni a. Election Commission-in kar kalta mai khan RUPP 474 zet chu a paih tawh a. Hemi zingah hian Mizoram political party zinga election commission a inziaklut 2 - Hmar People's Convention (HPC) leh Maraland Democratic Front (MDF) te chu paih zingah an tel. HPC hi la ding reng mah se inthlanna-ah an party hminga chuh lovin party dang nena thawkhovin HPC candidate te chu independent angin kum rei tak an lo ding tawh a, inthlanna a an party hminga an chuh loh rei avangin paih a ni a. MDF hi awmze nei a inthlan a hmachhawn ngai lohna a rei tawh bawk avangin paih a ni bawk. He tih lai hian an party mal hminga inthlanna chu khat tak, People's Conference (PC) party erawh chu kum 2024 a Lok Sabha inthlanpui a candidate an neih ve leh zauh avang khan an la him rih ni a hriat a ni.

ECI chuan Representation of the People Act 1951 tlawhchhanin an tihtur pawimawh ber inthlanna kum 6 chhung chuh tawh lo registered unrecognised political party-te chu a thianfai mek a. Kar kal ta Ningani (September ni 18) khan RUPP 474 a paih bakah hian a hma-in RUPP 334 chu August ni 9 khan a lo paih tawh bawk a. Kar kalta Ningani a an paih zingah hian HPC leh MDF hi an tel ve a, an rual hian Uttar Pradesh-ah pheih chuan political party 121 zet paih an ni a. Thla 2 chhunga political party a paih zawng zawng zat hi 808 a tling tawh a ni.

Hei bakah hian state 23 a political party 359-te chu inthlanna chuh mah se an sum hman dan tangka kum 3 chhung zet ECI-a an thehluh tawh loh avangin paih theih dinhmunah an ding mek a. ECI chuan he'ng political party-te awmna state a chief electoral officer (CEO)-te chu an dinhmun thlithlai turin a hriattir tawh hlawm a ni.

HIGHWAY

Aizawl leh Silchar inkar kawngpui, a bikin Sairang leh Kawnpui inkar kawng chhe zual siam that tawh chu tunah hian a chhe leh hle tawh.

Kawng hi a chhiat leh nasat tawh em avangin Assam/Kolasib lam pan truck ruak an chhuah thlak tam ber chu kawng nalah an tang zel a. Lei laihna khawlin a nawr chhuah zel a ngai thin. Ningani atang khan truck ruak an chhuah ngam ta rih lo a, kawng nal tawk lekin ruah a tlak thin vang niin an sawi a. Hei bakah hian Kolasib Division PWD excavator pakhat chu Ningani lamah court order anga hren a nih leh bawk si avangin duh angin a ruak tlan tir hi a ngamawm loh niin an sawi a ni. Nimin tuk dar 8 leh a chanve atanga chhiar let a darkar 24 chhung khan Khamrang a Assam/Kolasib pan tur lirthei tangkhang zat hi 264 a ni a, Aizawl lam pan Kawnpui khua a tangkhang zat 339 niin a vai a truck tangkhang zat chu 603 zet a ni a. He tih lai vek hian Kawnpui atanga Aizawl lam pan truck chhuah a awm lova, Sairang peng leh Mualkhang/Khamrang inkar a tangkhang Assam/Kolasib lam pan 530 chhuah a ni thung a ni.

Mizoram Truck Drivers' Association (MTDA) hruaitute chuan kawngpui chhe zual lai siamthat hi a chhiat leh deuh vek tawh bakah a nal em avangin truck engemaw zat a tlu a, chu chuan truck dang kal tur a dal tam hle niin an sawi a. NHDCL lam hian siamthat hna an thawh zui that loh avang leh Mizoram sorkar atanga nawrna a awm bawk lova an hriat avangin tun ang renga kawngpui dinhmun hi a nih zel chuan tlan rih loh mai an tintuah niin an sawi a. He lai kawngpui a truck tlantir hi a hlahawm bakah vawi khat an tlan hian cheng tam tak senga an truck-te siamthat a ngai zel niin an sawi a. Aizawl leh Silchar inkar lehlang thin khan ni 4 atanga ni 5 laite an thang thin niin an sawi bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM ON GST

Prime Minister Narendra Modia chuan GST thar chuan ram hmasawna chanchin a rawn thlak dawn tih a sawi. Nimin tlaia ramchhung mipuite hnena a thuchah PM Modia chuan vawiina Navrati ni hmasa berah hman tan a ni dawn tih a sawi a. Mipuiten an duhzawng bungruate man tlawm zawkin an lei thei daw a. Hei hian ram hmasawna kawngah bung thar a thlen dawn tih sawiin thalai, mi naran, loneitute, hmeichhiate, dawrkai, sumdawng leh sum peipung thinten an hlawkpui dawn a nia ti.

Pu Modia chuan kum 11 kalta chhunga mi vaibelchhe 25 chuang retheihna ata khaichhuah an ni chu lawmawm atih thu a sawi a. Kuminah chhiah lak dan thar siamin kum khata cheng nuai 12 aia hniam lalut chinte chu chhiah awl an nih thu a sawi bawk a ni.

<><><>

SNSPA

Union Health and Family Welfare Ministry chuan tun thla ni 20 thleng khan ramchhungah health camp nuai 2 sing 8 leh sang 3 chuang Swasth Nari Sashakt Parival Abhiyaan hnuaiah buatsaih a ni tawh . September ni 17 khan he campaign hi hawn niin rampumah mi tam tak an tel a. Hmeichhia leh naupang nuai chuangin hriselna lama enkawltha an nei a ni.

<><><>

SEVA PARV

Mipui rawngbawl leh sawrkar inrelbawltha tha thupaia neiin Prime Minister Narendra Modia hnuaiah ramchhungah hmasawna tam tak thlen mek a ni. Tun tum Seva Parv ah chuan khawpuia tihhmasawna tura hmalakna tarlang ila. Kum 11 chhungin sawrkar chuan Prime Minister Modia hnuaiah inthlak danglamna turin chi a

tuh a. Sarwkar chuan Pradhan Mantri Awas Yojana-Urban leh PM Awas Yojana-Gramin hmangin mi tinin chenna in tha an neih theih nan beipui a thlak a ni. Hei bakah hian Smart Cities Mission hmangin khawpui tihchangtlun a ni a. Project sang 7 leh 500 chuang tihhlawhtlin ni tawhin cheng vaibelchhe nuai 1 sing 5 chaung sen tawh a ni. Hei bakah ihan AMRUT leh AMRUT 2.0 hmangin tui thianghlim leh thli sawngbawlna tha pek a ni bawk.

<><><>